

TEZAU LITURGIC
4 MARTIE

ACATISTUL
SF. CUVIOS
DANIEL
ALEXANDROVICI
DE LA
MOSCOVA



MOSCOVA, 2000



Акафист

святому благоверному князю

Даниилу, Московскому

чудотворцу

Кондак 1

Избранный чудотворче и предивный угодниче Христов, града Москвы и державы Российския крепкое ограждение, раздоров и нестроений искоренителю, благоверный княже Данииле, похвальная восписуем ти, к раце мощей твоих притекающе. Ты же, яко имеяй дерзновение ко Господу, от всяких нас бед свободи, зовущих:

Радуйся, преподобне княже Данииле, Московский чудотворче.

Икос 1

Ангелов Творец и Господь во дни великих бед и напастей, обышедших страну нашу от нечестиваго царства агарянского, восхотев людем страждущим утешение даровати, яви ты,

княже Данииле, яко плод красен от чресл
великаго князя Александра; людие же, о
рождении твоём радости исполнившеся,
взываху ти сицевая:

Радуйся, корене благочестиваго прозябение;
радуйся, добродетелей отца твоего и матере
наследниче.

Радуйся, рождением твоим люди града
Владимира возвеселивый;

радуйся, грядущую славу Москвы
предвозвестивый.

Радуйся, избранниче Божий;

радуйся, правило веры благочестивых.

Радуйся, образе кротости духовных;

радуйся, Бога, яко истиннаго Отца нашего,
издетска познавый.

Радуйся, яко Иосиф, от братии твоея
досаждения сладце претерпевый;

радуйся, последи и братию свою в любовь
себе призывай.

Радуйся, преподобне княже Данииле,
Московский чудотворче.

Кондак 2

Видяще ближнии твои, блаженне, день от дне во благочестии ты возрастающа, и не точию млеко матерним, но паче благодатию Божиею питаема, радовахуся и, Господа о сем хваляще, взываху: Аллилуиа.

Икос 2

Разум богопросвещен имея, уразумел еси, всехвальне, по словеси апостольскому, яко нужнейши всего есть благочестие, имже и потщался еси обогатити душу твою, в молитвах и научении словеси Божию всеусердно пребывая. Того ради людие ублажаху тя сице:

Радуйся, молитвенниче теплейший;

радуйся, послушниче Евангелия усерднейший.

Радуйся, добродетели высокие в сердце твоём вкоренивый;

радуйся, в заповедех Господних вся дни живота твоего ходивый.

Радуйся, образом жития твоего мир посреде братии водворивый;

радуйся, Господа твоего паче всех
возлюбивый.

Радуйся, положить душу свою за други своя
непрестанное желание имевый;

радуйся, благодать Господню в сердце свое
заключивый.

Радуйся, и тело свое тою просветивый;

радуйся, оное и по смерти нетленно
сохранивый.

Радуйся, преподобне княже Данииле,
Московский чудотворче.

Кондак 3

Сила Вышняго укрепляше тя, блаженне, егда
в кротости и в смирении души твоея возрастая,
уготовлял еси себе на служение княжеское и о
помощи небесней молился еси, взывая Богу:
Аллилуиа.

Икос 3

Имея присно в души твоей глагол Господень,
пророку реченный: «На кого воззрю, токмо на
кроткого и смиренного, и трепещущаго словес
Моих», потщался еси, святе, оными

добродетельми себя украсить. Того ради
ублажаем тя сице:

Радуйся, подвижниче доблий, на высоту
добродетелей возшедый;

радуйся, нищетою духовною Царствие
Небесное стяжавый.

Радуйся, кротости ради землю обетования
наследивый;

радуйся, правды и истины паче всего
искавый.

Радуйся, чистотою сердца твоего Господа
созерцавый;

радуйся, миротворец нарочит в житии своем
явивыйся.

Радуйся, изгнания правды ради смиренно
претерпевый;

радуйся, мзду вечную добродетельми
стяжавый.

Радуйся, чистоты душевныя и телесныя
сокровище;

радуйся, любви и кротости Христовы
вместилище.

Радуйся, преподобне княже Данииле,
Московский чудотворче.

Кондак 4

Бурею агарянского нашествия людие
российстии потрясаеми, на тя, всечестне, яко на
избранника Божия, взираху и, под кров твой
державный прибегающе, защищение и
утешение приимаху, вкупе с тобою взывающе
Богу: Аллилуиа.

Икос 4

Видяще, святе, братия твоя отрока ты еще
мала суща, наследия отча лишити ты умыслиша
и удел малейший, Московский, точию вдати ти
изволиша; ты же, кроток сый и незлобив,
ничтоже противовещал еси и за обидящих ты
Господеву молился еси. Сего ради ублажаем ты
сице:

Радуйся, кротости Христовы подражателю;
радуйся, предивный нестяжателю.

Радуйся, удел твой малейший возвеличивый;
радуйся, всего себе воле Божией предавый.

Радуйся, от Него токмо единого помощи
искавый;

радуйся, богатство тленное презревай.

Радуйся, сокровища духовная возлюбивый;

радуйся, от юности в благодати у Бога и человек возраставый.

Радуйся, яко и по скончании земнаго жития твоего тую же благодать сугубо восприявый;

радуйся, яко и мы благодати Божия по молитвам твоим сподобляемся.

Радуйся, преподобне княже Данииле, Московский чудотворче.

Кондак 5

Боготечней звезде подобяся, на земли течение твое светло совершил еси, благоверный княже Данииле, лучи святости и потоцы милости всем изливая; ихже ради и в сонме святых пребываеши, поя с ними: Аллилуиа.

Икос 5

Слышавше ближнии и дальнии, яко в малем еще граде Москве на высоте стола княжескаго возблистал еси, преславне княже Данииле, под сень крилу твоею притекаху, похвалы таковыя ти приносяще:

Радуйся, княже благосердый, любовь свою
вся покрываяй;

радуйся, владыко прелюбимый, бедствующия
защищай.

Радуйся, мудрость отца твоего, князя
Александра, восприявый;

радуйся, страны Московския утверждение.

Радуйся, державы Российския украшение;

радуйся, Церкви Христовы похвало высокая.

Радуйся, людей российских упование
благонадежное;

радуйся, тобою бо во едино братство
совокупляемся.

Радуйся, яко твоим научением от распрей
свобождаемся;

радуйся, заповедей Божиих верный
исполнителю.

Радуйся, преподобне княже Данииле,
Московский чудотворче.

Кондак 6

Проповедник Царствия Божия явился еси,
благоверный княже Данииле: над людьми бо

своими царствуя, слезу всяку от лица страждущих отымал еси, подвизая звати всех: Аллилуиа.

Икос 6

Воссиял еси, яко пресветлое солнце, на престоле Московстем, благоверный княже Данииле, величием души твоея и добродетельми всю землю Российскую озаряя и подвизая всех ублажати тя сице:

Радуйся, мужу желаний духовных;
радуйся, стяжателю даров небесных.

Радуйся, милосердия сокровище неисчерпаемое;
радуйся, кротости наставниче.

Радуйся, заповедей евангельских делателю неленостный;
радуйся, нищету вольную Христа ради возлюбивый.

Радуйся, сиротам и вдовицам отче благосердый;
радуйся, людям твоим помощниче благодарованный.

Радуйся, в чине властителя кротость детскую проявивый;

радуйся, душу твою в храм Божий добре претворивый.

Радуйся, преподобне княже Данииле, Московский чудотворче.

Кондак 7

Хотяй Всевидец Господь прославить тя, блаженне, постави тя владыку преславна во смирении людех Своих, иже и взирающе на тя, и добродетелей твоих богатству чудящися, пояху Ему: Аллилуиа.

Икос 7

Новаго и дивнаго устроителя земли Российския вемы тя, княже Данииле, кротостию бо, смиренномудрием, братолюбием и мудростию небесною княжение Московское возвеличил еси и сильно сотворил еси е. Сего ради приими от нас сицевая:

Радуйся, мудрость Соломонову стяжавый;

радуйся, кротость Давидову восприявый и тою враги твоя победивый.

Радуйся, многия други себе стяжавый;

радуйся, стольный град твой храмы Божиими
украшивъ.

Радуйся, величию Москвы тем послуживый;
радуйся, воине Христов неодоленный.

Радуйся, от бед и скорбей всем скорое
прибежище;

радуйся, от всех зол твердое защищение.

Радуйся, унывающим доброе вразумление;

радуйся, всем братолюбцем присное
ободрение.

Радуйся, преподобне княже Данииле,
Московский чудотворче.

Кондак 8

Странника и пришельца себе на земли быти
помышляя, час кончины твоея пред очима
твоима присно имел еси и сего ради обитель
иноком во славу тезоименитаго ти преподобнаго
Даниила возградил еси, идеже молитвы твоя
Господеви возсылал еси, поя Ему: Аллилуиа.

Икос 8

Всего себе от юности Господу возложив, вся
дни живота твоего, благоверный княже. Тому

усердно работал еси и, ко блаженному успению достиг, в мире глубоце дух свой Ему предал еси. Людие же княжения твоего, окрест гроба твоего собравшеся, пояху ти сицевая:

Радуйся, княже наш превожделенный, ко Господу отошедый;

радуйся, нетленное тело твое нам оставивый.

Радуйся, ароматы добродетелей твоих нам благоухаяй;

радуйся, сиянием небеснаго света озаренный.

Радуйся, обилием любви твоея вся удививый;

радуйся, и врагом твоим благое упокоение у себе устроявый.

Радуйся, крепость державы твоея тем созидавый;

радуйся, наследником твоим присное научение.

Радуйся, гроб твой, аки краеугольный камень, граду Москве положивый;

радуйся, яко молитва твоя о людех и по смерти не оскудевает.

Радуйся, преподобне княже Данииле, Московский чудотворче.

Кондак 9

Вси небеснии чини и святых собори радостно
тя прияша, богомудре, подвиг земнаго течения
своего добре совершивша и к вечному животу
пресельшася, идеже с ними поеш: Аллилуиа.

Икос 9

Витий человеческих уста не возмогут изреци
пречуднаго прославления памяти твоея,
угодниче Божий, егда бо гроба твоего место
забвению предадеся, сам яве предстал еси
юноше благочестивому, господина месту тому
себе нарицая, и князя Иоанна обличая, и
глаголя: «Чесо ради предал мя еси забвению?
Аще же и забвен аз тобою, не забы мя Господь».
Мы же, явление Твое благоговейно почитающе,
сице вопием:

Радуйся, града нашего Москвы Богом данный
покровителю;

радуйся, обители твоея неусыпный
хранителю.

Радуйся, яко и по успении твоём нас не
оставляеши;

радуйся, яко милосердие Божие о гресех
наших умоляеши.

Радуйся, мзду трудов твоих восприявый;
радуйся, небесною славою душу твою
осиявый.

Радуйся, наследников твоих добрый учителю;
радуйся, к добродетели твердый тем
наставниче.

Радуйся, всем людям благий пред Богом
предстателю;

радуйся, молитвы их к престолу Его
возносяй.

Радуйся, преподобне княже Данииле,
Московский чудотворче.

Кондак 10

Спаستися всем хотяй Господь вельможу
некоего, гроб твой, святе, поправша, недугом
порази, обаче согрешение свое познавша и
прощение от тебе приемша помилова, да и мы
все, достойно почитающе тя, благодарно
вопием: Аллилуиа.

Икос 10

Стену неборимую и забрало крепкое граду
Москве и всей державе Российстей Господь
дарова тя, блаженне, верным в скорбех и

нуждах пребыстрое заступление, да зовем ти
сице:

Радуйся, призывающим тя во благое скорый
помощниче;

радуйся, чистоты душевныя и телесныя
сокровище.

Радуйся, душевных и телесных недугов
целителю;

радуйся, державы нашея утверждение.

Радуйся, Церкви Российския украшение;

радуйся, яко отец чадолюбивый, чада твоя
назираяй.

Радуйся, яко воевода непобедимый пределы
земли нашея ограждаяй;

радуйся, небрегущия о святыне страхом
вразумляяй.

Радуйся, яко кающимся скорое прощение
испрошаеши;

радуйся, яко благим подвигом тех научаеши.

Радуйся, преподобне княже Данииле,
Московский чудотворче.

Кондак 11

Пение всеумиленное приими от нас,
прехвальне, и молитвы, приносимыя тебе, не
презри: к тебе бо в скорбех прибегаем и пред
гробом твоим слезы проливаем, зовуще:
Аллилуиа.

Икос 11

Светозарна светильника благодати яви тебе
всех Творец, силою бо, данною ти свыше, юношу
при гробе твоём от одра смерти возставил еси.
Сего ради ублажаем тя сие:

Радуйся, милостивый скорбящим помощниче;
радуйся, сосуде, Святаго Духа исполненный.

Радуйся, дарами Того обогащенный;
радуйся, сими дарами и молящихся тебе
обогащай.

Радуйся, ко Святей Троице дерзновение велие
стяжавый;

радуйся, дерзновение сие на помощь людям
направляяй.

Радуйся, силу чудес от Бога приявый;
радуйся, за грешныя Господа умоляяй.

Радуйся, любви и кротости Христовы
вместилище;

радуйся, беспомощных скорый помощниче.

Радуйся, преподобне княже Данииле,
Московский чудотворче.

Кондак 12

Благодатию, данною ти свыше, недуги
исцеляеши, враги и супостаты от нас
отгоняеши, жизнь нашу умиряеши и душам
нашим полезная подаеши, да благодарственно
взываем Богу: Аллилуиа.

Икос 12

Поем честныя подвиги твоя, ублажаем чистое
житие твое, восхваляем священную память
твою, Данииле благоверне, и, прославляюще
Господа всех, вопием ти сице:

Радуйся, яко крест богоугоднаго жития до
конца понесл еси;

радуйся, яко о скорбех твоих Бога благодарил
еси.

Радуйся, всяку добродетель в себе
изобразивый;

радуйся, иго Христова возлюбивый.

Радуйся, немощи немощных на себе носивый;
радуйся, благоволение Божие людям твоим
испросивый.

Радуйся, присно на Небеси торжествуяй;
радуйся, на земли преславно чудодействуяй.

Радуйся, людям твоим помощниче
богодарованный;

радуйся, ангелом собеседниче достойный.

Радуйся, преподобне княже Данииле,
Московский чудотворче.

Кондак 13

О преславный угодниче Христов и
чудотворче, преподобне княже Данииле, отрадо
и утешение всех с верою к тебе прибегающих!
Приими от нас, недостойных, сие малое
моление, с любовью тебе приносимое, и теплым
ходатайством твоим ко Господу огради святую
обитель твою, умири жизнь нашу и даруй нам
покаяние совершенное, избави нас от бед и
вечныя муки, да купно с тобою благодарственно
вопием: Аллилуиа.

Этот кондак читается трижды, затем 1-й икос «Ангелов Творец ...» и 1-й кондак «Избранный чудотворче ...».

Молитва первая

Церкве Христовы похвало высокая, града Москвы стено неборимая, державы Российския Божественное утверждение, преподобне Данииле. К раце мощей твоих притекающе, усердно молим тя: призри на нас, память твою воспевающих и с верою под кров молитв твоих прибегающих. Пролей теплое твое ходатайство ко Спасу всех, яко да утвердит миром страну нашу, грады и веси ея и обитель сию добре да сохранит, благочестие и любовь в людех твоих насаждая, злобу же, междоусобие и нравов развращение искореняя; всем же нам вся благая ко временному животу и вечному спасению даруй молитвами твоими, яко да прославляем дивнаго во святых Своих Христа Бога нашего во веки веков. Аминь.

Молитва вторая

О угодниче Божий, святой благоверный княже Данииле, сада Христова благовонный цвете, неба церковнаго кроткая звездо, земли нашея небесный уме, града Москвы и державы

нашея мудрый здателю. Теплый к Богу молитвенниче, скорый в помощи, милостивый в нуждах, к тебе припадаем и тебе молимся: буди предстатель наш пред Престолом Божией славы неусыпный. Собери нас друг ко другу, да печали ближняго своего кийждо любовью нелицемерною приобщается. Онебеси ум наш, да, иго тяжкое земных попечений отвергше, бремя легкое Христова Евангелия возлюбим. Открой очи наши, да узрим нетленную красоту Господню и да не отчуждени будем жизни Божией. Тихость Духа Божия да соблюдет сердце наше. Весна покаяния да украсит дела наша.

Княже милостивый и щедрый, сохрани страну нашу, град твой и zde молящихся тебе от всякия напасти, от враг видимых и невидимых, от губительства и глада, от междоусобных распри и внезапных смерти. Отверзи нам двери милосердия Божия и избави нас от всякаго зла. Под крепкий покров благостыни твоея прибегающе, молим: буди нам тихое пристанище в скорбех. Остени нас молитвами твоими. Соблюди нас от падений греховных и заблуждений, да сердцем сокрушенным, духом смиренным в печали и радости выну зовем:

Господи, предстательством преподобнаго Твоего
помилуй нас. Аминь.



ПОЛНЫЙ АКАФИСТНИК КАНОНИЧЕСКИЙ

АКАФИСТЫ
КО ГОСПОДУ БОГУ
ПРЕСВЯТОЙ
БОГОРОДИЦЕ
АРХАНГЕЛАМ
И АНГЕЛАМ

І

НОВОЕ
* НЕБО